

Date – 26/07/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

AKASHVANI AIZAWL

1. Mizoram sorkar leh kohhran hruiatute'n FCRA dan siamthatna tura rawtna an siamte central sorkarin a pawm lo a nih chuan Mizoram Lok Sabha MP-in he dan siamthatna tur hi Parliament-ah a dodal dawn.
2. Baptist Kohhran chuan vawiin chawhma inkhawmah khan India sorkarin FCRA tihdanglam a tum a kaltlangpui loh na'n tawngtai rualna hun an hmang.
3. Mizoram Universal Healthcare Scheme (MUHCS 2.0) hmangin tangka kum kal mekah damlo enkawlna atan cheng vaibelchhe 60 chuang hman a ni tawh.
4. Prime Minister Narendra Modi-a'n Kargil Vijay Diwas-ah ram tana nunna hlantu sipai huaisente hriat reng an ni, a ti.



FCRA

Mizoram sorkar leh kohhran hruiatute'n Foreign Contribution Regulation (FCRA) dan siamthatna atana rawtna an siamte central sorkarin a pawm lo a nih chuan Mizoram Lok Sabha MP-in he dan siamthatna tur hi Parliament-ah a dodal dawn.

He thu hi Zirtawpni khan Chief Minister Pu Lalduhoma'n Kawrthah khua-ah a sawi a. Kohhran hrang hrang hruiatute nen FCRA chungchanga an inrawnkhawmna a an thutlukna leh sorkar laipui-in he dan siamthat a tum dan an duh lohte an thlen chu pawm a nih loh chuan he dan siamthat tura rawtna Parliament a sawiho anih hunah Mizoramin Lok Sabha MP a neih chhun Pu Richard Vanlalmangaiha chu dodal tura hrih a ni dawn a ni, a ti. Zirtawpni zan khan ZPM party thuneitu sang chuan hemi chungchang hi an ngaihtuah tawh a. Chumi zulzui chuan nimin khan Chief Minister chenna inah Chief Minister hovin Council for Churches in Mizoram (CCM) leh Mizoram Kohhran Hruaitute Committee (MKHC) ten an sawiho leh a. Heta kal khawmte chuan dan siam that tura duan, tuna Bill ang ang hi chuan pawm theih lohah an ngai a. Tihdanglam rawtna hi Memorandum hmangin sawrkar in lo buatsaih se. Chief Minister in Home Minister hnenah appointment lo buaipui se, MKHC leh CCM hruiatu te nen Delhi ah Memorandum thehluh ni se tih an rel a ni.

Chief Minister hi Adviser to CM pahnih - Pu Lalmuanpuia Punte leh TBC Lalvenchhunga ten an tawiawm a ni.



MASS PRAYER

Mizoram Baptist Kohhran chuan vawiin chawhma inkhawmah sorkar laipuiin Foreign Contribution Regulation Act (FCRA) tihdanglam a tumna, a kaltlangpui loh na'n tawngtai rualna hun an hmang a, India sorkarin FCRA tihdanglam a tum hi a kaltlangpui loh na'n, he dan avanga harsatna lo tawk thin zawng zawngte'n harsatna an tawh chhonzawm loh na'n, India rama kan Kristian pui tihduhdahna leh nekchepna tawk thinte tan, India ramah sakhaw zalenna a awm a, mipuite kan inpumkhat theih na'n, tih leh India ramah Pathian ram a lo zau deuh deuh theih na'n tih thupui hmangte in an tawngtai rual a ni.

Mizoram Baptist Kohhran puipate hian Zirtawpni khan tualchhung kohhran tin hnenah tawngtai rualna hun hmang tur hian ngenna an siam a. Parliament fur thutkhawma ngaihtuah tura chhawpchhuah tum FCRA dan siamthat tura duan chuan a chhe zawngin Kristian pawl hrang hrangte a nghawng thei dawn ni a an hriat thu an tarlang a. Hemi avang hian Kristian pawl hrangte'n dodalna an kalpui mek thu leh India rama Kristian sang tam takin harsatna nasa leh zual an tawh theih dawn avang hian FCRA puala ram pum tawngtai rual buatsaih hi an rel thlu ta tih an sawi a ni.



CIVIL HOSPITAL

Civil Hospital, Aizawl Senior Medical Superintendent Dr. Lalchhuankimi chuan tun hnaiah an damdawi in chuan nasa takin hma a sawn tih a sawi.

Tun hnai khan Civil Hospital hian Kayakalp Award 2025-2026 an dawn an lawm a, he hunah hian Dr. Lalhchhuankimi chuan kumin January thla atang khan Cardiac Catherisation Cath Lab thar chu tangkai taka hman a ni tih a sawi a, Cardiac Catherisation Cath Lab chu lung tihrawl chawmtu thisen zam pin leh pin loh enna a ni tih sawiin, a lo pin chuan Sten vuah thin a ni a, lungphu battery (Pacemaker) a vuah theih a, lungpawp thenkhat a thawm theih a ni ati.

Kan Correspondent sawi danin Civil Hospital Paediatric Department ah Neonatologist an neih avangin SNCU chu tha takin kalpui theih a ni tawh a, Paediatric Critical Care lamah Super Specialist an neih tak avangin Paediatric HDU leh ICU an nei tawh bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



MUHCS

Mizoram Universal Healthcare Scheme (MUHCS 2.0) hmangin tangka kum kal mekah damlo enkawlna atan cheng vaibelchhe 60 chuang hman a ni tawh.

MUHCS website tarlan danin, kumin April atanga July thla thlengin damlo bill 20244 pek chhuah a ni tawh a, hemi atana pawisa pek chhuah zawng zawng chu cheng vaibelchhe 60, nuai 78 sing 9 sang 8 leh 606 a ni. Mizoram State Health Care Society (MSHCS)-in damlo bill pek chhuah tawh dan an tarlan danin, sorkar kum kal mek 2026-27 ah hian April-July 2026 chhungin Mizoram sorkarin MUHCS zawmtu damdawi-inte hnenah damlo enkawlna senso tur tum kua a pe chhuak tawh a ni. Sorkar tangka kum kalta, 2025-26 April-July 2025 chhung khan MUHCS zawmtu damdawi-inte hnenah tum 20 pawisa pek a ni a, pawisa pek chhuahtehi damlo 23,560-te enkawlna senso cheng vaibelchhe 29 nuai 81 sing 8, sang 5 leh 410 a ni.



VEHICLES NOT TO PLY

Kolasib District chhung National Highway-154, Bairabi kawng chu a chhiat nasat avangin mihring phura eizawng lirtheite’n naktuk atanga tlan loh an titlu.

Rengtekawn leh Bairabi inkar, a bikin Zero Point leh Pangbalkawn inkar kawngpui chu a chhiat nasat tawh avangin he kawnga mihring phur lirthei tlan thin - Bus, Maxi Cab leh Taxi te chuan kawng a zia-awm hma chu service na tlakah ngai tawh lovin naktuk Thawhtanni atang hian chawlh rih nise an ti a. An tlan loh avanga mipui harsatna tawkte hriatthiamna an ngen ani.

He lai kawngpui a Bus, Maxi Cab leh Taxi an tlan loh chhung hian, hire pawhin tumah tlan loh ni se an ti a. Mipui paw’n nawrlui lo turin an ngen a. Kawng siamtute’n chak zawka hna an thawh theih na’n hun thawl siamsak ni se, kawng a zia-awm deuh hunah service chhunzawm leh nise,an ti ani.



TOURIST FOOTFALL

Kumin thla 5 chhungin India ram hmun dang leh ram pawn atangin Mizorama lo zin mi sing 9 chuang an awm tawh a, khualzin zingah hian rel a Mizorama rawn lut an tam ber.

Mizoramah khualzin an pung zel a, Sairang rel chawlhmun hawn a nih hnua Mizorama zin an pung nasa zual a. Toursim department-in an chhinchhiah danin kumin January atanga May thla chhung khan Sairang rel chawlhmun, Lengpui tumhmun, Vairengte, Kanhmun leh Bairabi paltlanga Mizorama rawn lut, ILP pek khualzin mi sing 9 sang 8 leh 576 an awm a. Rel hmanga Mizorama rawn lut an tam ber a, Sairang Rel chawlhmun a rawn thleng ILP pek chhuah mi sing 4 sang 3 leh 298 an awm a, thla 5 chhunga khualzin zawng zawng atanga chhutin Rel hmanga Mizorama zin hi za zela 43 point 92 an tling a ni.

Thlawhna hmanga Mizorama zin a, Lengpui thlawhna tum hmuna ILP la mi 12,262 an awm bawk a, hei hi khualzin zawng zawng atanga chhutin za zela 12.43 a tling a. Lirthei hrang hrang hmanga Mizorama zin pawh an thahnem hle a, Assam state atanga Mizoram luhka Vairengte-a rawn lut, Police Check Gate atanga ILP la mi 16,010 an awm a, Kanhmun Police Checkgate paltlanga ILP la mi 1,049 leh Bairabi Police Check Gate atanga Mizorama rawn lut ILP la mi 25,957 awm bawkin, Lirthei hmanga Assam atanga Mizorama rawn lut hi an vaiin mi 43,016 an ni a; hei hi thla 5 chhunga Mizorama zin zawng zawng atanga chhutin za zela 43.63 a tling a, Rel leh Lirthei hmanga Mizoram rawn zin hi an in zat thuak a ni.

<><><>

MANN KI BAAT

Prime Minister Narendra Modi-a’n Kargil Vijay Diwas-ah ram tana nunna hlantu sipai huaisente hriat reng an ni tih sawiin ralthuam siam chhuah lamah a ni emaw, ramdanga hralh chhuah a ni emaw, ram dang nena thawh dunna tha neih a ni emaw, India chuan hma lam a pan chho zel a ni, a ti.

Vawiin Akashvani-a Mann Ki Baat hun a hmanna-ah he thu hi sawiin Pu Modi-a chuan vawiin July ni 26 hi calendar-a a hranpaa chhinchhiah tul lo, Kargil indonaa India sipaiten hnehna an chan lawmna ni, Kargil Vijay Diwas a ni, a ti a, Mother India venhim nana an nunna hlu tak hlantute leh sipaite hnenah zahna chibai a hlan a ni.

<><><>

GOVT TO INTRODUCE

Naktuk Lok Sabha inkhawmah Union Minister, Dr. Jitendra Singh-a’n Public Examinations (Prevention of Unfair Means) Amendment Bill, 2026 a pu lut dawn a, he bill hi Public Examinations (Prevention of Unfair Means) Act, 2024 siam thatna tur a ni.

Zirtawpni kalta khan Union Cabinet chuan exam zawhna putru kaihnawihah leh dik lo taka thil tite chungchang, rang taka ngaihtuah tur tur Fast Track Court dinna tur draft bill a pawm a ni.

<><><>